

**9. Sastanak Strana Okvirnog Sporazuma o slivu rijeke Save**  
**Zagreb, 9. Decembar 2022. godine**

**IZJAVA:** Zoran Andrić

U svim strateškim dokumentima zemalja koje pripadaju slivu rijeke Save danas se mogu pronaći ista opredjeljenja kroz razvojnu komponentu koju može ostvariti plovni put rijeke Save. Ovaj nimalo lak zadatak pred Savskom komisijom i drugim uspostavljenim zajedničkim tijelima uspješno se savladava. Plovni put rijeke Save se iz godine u godinu obnavlja i unapređuje. Koridor kojim ova rijeka direktno povezuje više gradova ne ostavlja niti jedan trenutak za predah. Uporedo, provodi se i razvoj transportne infrastrukture u drugim vidovima saobraćaja. Razvijaju se luke, željeznice. Intermodalnost je bliža nego ikada.

Svijest o značaju plovnog puta rijeke Save u Bosni i Hercegovini i njenim institucijama još uvijek nije na zavidnom nivou. Udio u međunarodnom slivu od 39,25% traži od nadležnih institucija u Bosni i Hercegovini potpunu predanost realizaciji ciljeva Okvirnog sporazuma.

Prema podacima Svjetske banke Bosna i Hercegovina je zemlja sa najvećim količinama pitke vode u regiji, sedma u Evropi, a po vodnim resursima bogatija je od mnogih zemalja svijeta. Uzimajući u obzir da je ključno opredjeljenje Bosne i Hercegovine integracija u Europsku uniju, reforma i prioriteti u sektoru voda su fokusirani na usklađivanje sa zakonodavstvom u Evropskoj uniji. Bosna i Hercegovina, kao potencijalni kandidat za članstvo u EU, preuzela je djelimično ili u potpunosti sve ključne ciljeve zakonodavstva EU u pogledu upravljanja vodama, i ugradila ih u svoje zakonske i strateške dokumente. Glavni izazovi upravljanja vodama su vezani za pravilno provođenje i ostvarivanje ciljeva Okvirne Direktive o vodama, Direktive o vodi za piće, Direktive o tretmanu urbanih otpadnih voda i drugih direktiva kojima se omogućava integrисано upravljanje vodnim resursima.

Sa druge strane, sliv rijeke Save je područje koje je izloženo klimatskim promjenama i područje na kojem se osjećaju posljedice suša, poplava i drugih ekstremnih događaja čije se frekvencija i intenzitet mijenjaju. Mnogi ekonomski sektori kao poljoprivreda, proizvodnja električne energije putem hidroelektrana, te sektor turizma direktno su povezani s klimom. A što može imati dugotrajne posljedice na održivi razvoj.

Implementacija Drugog plana upravljanja slivom doveće do unapređenja regulatornog okvira vezano za sliv i za postizanje poboljšanja stanja svih voda i zaštićenih područja, te jačanja saradnje za dugoročno i održivo korištenje vodnih resursa u slivu rijeke Save. Sveukupan doprinos u izradi Drugog Plana upravljanja slivom rijeke Save dali su pojedinci iz različitih institucija i agencija, te koristim priliku da im se svima još jesnom zahvalim.

Zbog svega navedenog je ulaganje u dalje unapređenje plovnog puta od suštinskog značaja za razvoj regiona.

Konačno, poslije dugo vremena, deminiranje desne obale rijeke postalo je i praktično prioritetno pitanje, kao glavna smetnja daljem razvoju infrastrukture na ovom području, i čiju realizaciju uskoro očekujemo, do ostvarenja konačnog cilja – desne obale rijeke Save bez mina.

Savska komisija ostaje glavni instrument za postizanje ciljeva postavljenih Okvirnim sporazumom, čemu Bosna i Hercegovina daje punu podršku. Sekretarijat Savske komisije je dokazao da, pored svih izazova, može odgovoriti zadatku i napredak u svim oblastima nadležnosti Sekretarijata je jasno vidljiv.

Hvala domaćinima za odličnu organizaciju ovog događaja danas.

Hvala vam za pažnju.